

Primeiru-Ministru Taur Matan Ruak iha reuniaun KE no KSDS kona-ba estensaun EE ba dualuk

Dili, loron 30 fulan-novembru tinan 2020 – Sua Eselénsia Primeiru-Ministru, Taur Matan Ruak, segunda ohin, partisipa iha reuniaun Konsellu Estadu (KE) no Konsellu Superior Defeza no Seguransa (KSDS) iha Palasiu Prezidente Nicolau Lobato, ne'ebé mak prezide hosi S.E. Prezidente Repúblika, Dr. Francisco Guterres Lú Olo, hodi halo diskusaun kona-ba deliberaun Governu nian ba estensaun Estadu Emerjénsia ba dualuk relasiona ho pandemia KOVID-19 ne'ebé to'o ohin kontinua kontajia mundu tomak.

Objetivu Governu solista ba Prezidente Repúblika hodi kontinua estende Estadu Emerjénsia, nune'e bele fó kbiit ba Governu iha luta kontra kalamidade umana ne'ebé daudaun ne'e atinje nasaun tomak iha mundu, liuliu haree ba kazu kontájui iha país vizitiu hanesan Indonézia no Austrália ne'ebé nia número kada loron kontinua aumenta, ne'ebé bele sai risku ba kontájui importasaun.

Iha reuniaun rua refere, membru sira hosi KE no KSDS fó sira nia pareser kona-ba importánsia ba estensaun Estadu Emerjénsia, hodi sujere Xefe Estadu atu husu autorizasaun Parlamentu Nasionál nian hodi deklara Estadu Emerjénsia.



Haree ba evolusaun preokupante husi situasaun epidemiolójika no proliferasaun kazu kontájui COVID-19 nian ne'ebé rejista ona, tantu iha nivel rejionál, no mós nivel mundiál, no ho hanoin atu evita no neutraliza risku sira husi propagasaun SARS-CoV-2 nian ne'e, nune'e bele proteje saúde públika no kapasidade resposta nian husi Sistema Nasionál Saúde, mak Governu delibera ona iha sorumutu Konsellu Ministru nian iha loron 25 fulan-novembru tinan 2020, hodi propoin ba Prezidente Repúblika atu husu Parlamentu Nasionál nian autorizasaun hodi fó-sai Deklarasaun Estadu Emerjénsia.

Estadu Emerjénsia ba dahituk nian, hahú hosi loron 4 fulan-novembru ne'e no sei termina iha loron 3fulan-dezemburu tinan 2020.

Dezde pandemia global ne'e mosu dahuluk iha sidade Wuhan-Xina iha Dezemburu tinan 2019, no alastra ba mundu tomak inklui mós Timor-Leste. To'o data ohin nian, tuir relatóriu Ministériu Saúde nian, Timor-Leste rejista kazu pozitivu hamutuk 30, no rekuperadu hotu ona, daudaun ne'e la iha kazu ativu, nune'e mos la iha kazu óbitu.

Entretantu tuir dadus hosi <https://www.worldometers.info/coronavirus>), ba nivel kazu mundial nian, to'o loron 30 fulan-novembru tinan 2020, rejista ona kazu pozitivu KOVID-19 hamutuk millaun **63,072,905**, óbitu millaun **1,465,186**, no rekuperadu ona millaun **43,546,236**. **HOTU/MGPM**